

錢考功集

開化圖書館

Kaichua Library

開化圖書館

Kaishua Library

開化圖書館

Kaishua library

開化圖書館

Kaishua library

錢考功集

四部叢刊集部

上海涵芬樓景
印明活字本原
書板心高營造
尺六寸寬四寸

開

Ua

館

Library

錢考功集卷第一

五言古詩

東陽郡齋中詣南山招韋十

霽來海畔山隱映城上起中峰落照時殘雪
翠微裏同心久爲別孤興那對此良會何遲
遲清陽瞻則爾

青泥驛迎獻王侍御

候館掃清晝使車出明光森森入郭樹一道
引飛霜仰視駘花白多慙綬色黃鷦鷯無羽

翼願假憲鳥翔

沐陽古渡作

日落問津處雲霞殘碧空牧牛避田燒退鷓
隨潮風回首故鄉遠臨流北路窮翩翩青冥
去羨彼高飛鴻

卧疾荅劉道士

白露蛩已急空林日淒清寥寥扉掩獨卧
愁窓明寶字比仙藥羽人寄柴荆長吟想風
馭恍若升蓬瀛

夢尋西山準上人

別處秋泉聲至今猶在耳何嘗夢魂去不見
雪山子新月隔林時千燈翠微裏言忘心更
寂跡滅雲自起覺來纓上塵如洗功德水

長安旅宿

九秋旅夜長萬感何時歇蕙花漸寒暮心事
猶楚越直躬遭世道咫尺隔天闕每聞長樂
鍾載泣靈臺月明日北門外歸途堪白髮

過桐栢山

秋風過楚山山靜秋聲晚賞心無定極僊步
亦清遠反照雲竇空寒流石苔淺羽人昔已
去靈跡欣方踐接策謝歸途世緣從此遣

李士曹廳對雨

春雨暗重城訟庭深更寂終朝人吏少滿院
煙雲積濕鳥厭花枝新苔宜砌石掾曹富文
吏清興對詞客愛爾蕙蘭叢芳香飽時澤

登勝果寺南樓雨中望嚴協律

微雨侵晚陽連山半藏碧林端陟香樹雲外

遲來客孤村凝片煙去水生遠白但佳川原
趣不覺城池夕更喜眼中人清光漸咫尺

冬夜題旅館

退飛憶林藪樂業羨黎庶四海盡窮途一枝
無宿處嚴冬北風急中夜哀鴻去孤燭思何
深寒窓坐難曙勞歌待明發惆悵盈百慮

自終南山晚歸

采苓日往還得性非樵隱白水到初闕青山
辭尚近絕境勝無倪歸途興不盡沮溺時反

顧牛羊自相引逍遙不外求塵慮從茲泯

早渡伊川見舊作

鷓鴣鳴曙霜秋水寒旅涉漁人昔隣舍相見
具舟楫出浦興未盡向山心更愜村落通白
雲茅茨隱紅葉東臯滿時稼歸客欣復業

夕發箭場巖下作

行役不遑安在幽機轉發山谷無明晦溪霞
自興沒朝櫛杉下風夕飲石上月懿爾青雲
士垂纓朝鳳闕寧知採竹人每食慙薇蕨

同李五夕次香山精舍訪憲上人

彼岸聞山鍾
仙舟過苔水
松門入幽映
石逕趨迤邐
初月開草堂
遠公方覲止
忘言在閑夜
凝念得微理
泠泠功德池
相與滌心耳

雨中望海上懷鬱林觀中道侶

山觀海頭雨
懸森動煙樹
只疑蒼茫裏
鬱鬱鳥欲飛
去大塊怒天
吳驚潮蕩雲
路群真儼盈
想一葦不可
渡惆悵赤城
期願假輕鴻
馭

廣德初鑿駕出關後登高愁望二首

長安不可望望處邊愁起輦轂混戎夷山河
空表裏黃雲壓城闕斜照移烽壘漢幟遠成
霞胡馬來如蟻不知涿鹿戰早晚蚩尤死渴
日候河清沉憂催暮齒

愁看秦川色慘慘雲景晦乾坤暫運行品物
遺覆載黃塵漲戎馬紫氣隨龍旆掩泣指關
東日月祆氛外臣心寄遠水朝海去如帶周
德更休明天衢佇開泰

過曹鈞隱者

茶蕙有其性馨香道爲人不居衆芳下寧老
空林春之子秉高節攻文還守真素書寸陰
盡流水怨情新濟濟振纓客煙霄各致身誰
當舉玄晏不使作良臣

獨住覆釜寄郎士元

賞心無遠近芳月好登望勝事引幽人山下
復山上將尋洞中藥復愛湖外嶂古壁苔入
雲陰溪樹穿浪誰言世緣絕更惜知音曠鶯
啼綠蘿春迴首還惆悵

送王季友赴洪州幕下

列郡皆周武南征所從誰諸侯重才略見子
如瓊枝撫劍感知已出門方遠辭煙波帶幕
府海日生紅旗問我何功德負恩留玉墀銷
魂把別袂愧爾酬明時

客舍贈鄭貫

結交意不薄匪席言莫違世義隨波久人生
知己稀先鳴誓相達未遇還相依一望金門
詔三看黃鳥飛暝投同旅食朝出易儒衣愁

向林廬接携手行將歸

山中春仲寄汝上王恒穎川沈冲

隱者守恬泊春山日深靜誰知蟠木材得性
無人境座隅泉出洞竹上雲起嶺飢狘入山
厨飲虹過藥井前溪堪放逸仲月好風景遊
目來遠思摘芳寄汝穎

南中春思

入仕無知言遊方隨世道平生願開濟遇物
千懷抱已阻青雲期甘同散樗老客遊南海

曲坐見韶陽
蚤舊國別佳人
他鄉思芳草
惜無鴻鵠翅
安得凌蒼昊

東陵藥堂寄張道士

木落蒼山空
當軒秋水色
清旦振衣坐
永吟意何極
願言金丹壽
一假鸞鳳翼
日夕開真經
言忘心更默
玄都有仙子
採藥早相識
煙霞難再期
焚香空歎息

苦雨憶皇甫冉

涼雨門巷深
窮居成習靜
獨吟愁霖雨
更使

秋思未疲痾苦昏墊日夕開軒屏草木森已
悲衾博清且冷如何遊宦客江海隨泛梗延
首長相思憂襟孰能整

寄任山人

天階崇黼黻世路有趨競獨抱中孚爻誰知
苦寒詠行潦難朝海散材空遇聖豈無鳴鳳
時其如問津命所思青山郭再夢綠蘿逕林
泉春可遊羨爾得真性

登秦嶺半巖遇雨

屏翳忽騰氣浮陽慘無暉千峰掛飛雨百尺
搖翠微震電閃雲逕奔流翻石磯倚巖假松
蓋臨水羨荷衣不得采苓去空思乘月歸且
憐東臯上黍色侵荆扉

杪秋南山西峯題隼上人蘭若

向山看霽色步步豁幽性反照亂流明寒空
千嶂淨石門有餘好霞殘月欲映上詣遠公
廬孤峰懸一徑雲裏隔窓火松間下山磬客
到兩忘言猿心與禪定

田園雨後贈鄰人

安排常任性，偃卧晚開戶。
樵客荷蓑歸，向來春山雨。
殘雲虹未落，反景霞初吐。
時鳥鳴村墟，新泉遶林圃。
堯年尚恬泊，隣里成太古。
室邇邇人遙，遙相思怨芳杜。

天門谷題孫逸人石壁

崖口亂流處，竹深斜照歸。
主人卧蟠石，心耳滌清暉。
春雷近作解，空谷半芳菲。
雲棟綵虹宿，藥圃蝴蝶飛。
惡器慕嘉遁，幾夜瞻少微。
相

見竟何說忘情同息機

藍溪休沐寄趙八給事

蟲鳴歸舊里田野秋農閑
即事敦夙尚衡門方再關
夕陽入東籬爽氣高前山
霜蕙後時老巢禽知暝還
侍臣黃樞寵鳴玉青雲間
肯想觀魚處寒泉照髮斑

遊輞川至南山寄谷口王十六

山色不厭遠我行隨趣深
蹟幽青蘿徑思絕秋霞岑
獨鶴引過浦鳴猿呼入林
褰裳百泉

裏一步一清心王子在何處隔雲鷄犬音折
麻定延佇乘月明招尋

藍田溪與漁者宿

獨遊屢忘歸况此隱淪處濯髮清泠泉月明
不能去更憐垂綸叟靜若沙上鷺一論白雲
心千里滄洲趣蘆中夜火盡浦口秋山曙歎
惜分枝禽何時更相遇

淮上別范大

悲風墮涼葉送歸怨南楚窮年將別離寸晷

金華功身卷一
九
伸宴語長淮流不息征棹忽復舉碧落半愁
雲黃鶴時顧侶遊宦且未達前途各脩阻分
袂一相嗟良辰更何許

離居夜雨奉寄李京兆

永夜不可度蛩吟秋雨滴寂寞想章臺始歎
雲泥隔雷聲匪君車猶時過我廬電影非君
燭猶能明我目如何瓊樹枝夢裏看不足望
望佳期阻愁生寒草綠

嘆畢少府以持法無隱見繫

用法本禁邪盡心翻自極畢公在囹圄世事
何糺纏翠鳳呈其瑞虞羅寄鍛翼囚中千念
時窓外百花色落景閉園扉春蟲網叢棘古
人不念文紛淚莫沾臆

小園招隱

支離鮮兄弟形影如手足但遂飲冰節甘辭
代耕祿班衣在林巷始覺無羈束交柯低戶
陰閒鳥將雛宿窮通世情阻日夜苔徑綠誰
言北郭貧能分晏嬰粟

過温逸人舊居

反真難合道懷舊仍無弔浮俗漸澆漓斯人
誰繼妙聲容在心耳寧覺阻言笑玄堂閉幾
春拱木齊雲嶠鶴傳居士舞猿得蘇門嘯酌
酒片陽微空山想埋照

縣內水亭晨興聽訟

晨光起宿鷺池上判黎甿借問秋泉色何如
拙宦情磨鉛辱利用策蹇愁前程昨夜明月
滿中心如鵲驚負恩時易失多病績難成坐

惜寒堂晚霜風吹杜蘅

酬王維春夜竹亭贈別

山月隨客來主人興不淺
今宵竹林下誰覺
花源遠惆悵曙鶯啼
孤雲還絕巘

送張少府

愁雲破斜照別酌勸行子
蓬驚馬首風鴈拂
天邊水寸晷如三歲
離心在萬里

送楊著作歸東海

楊柳出關色東行千里期
酒酣暫輕別路遠

始相思欲識離心盡斜陽到海時

送李協律還東京

芳草忽無色王孫復入關
長河侵驛道匹馬傍雲山
愁見離居夕螢飛秋月閑

秋館言懷

蟋蟀已秋思蕙蘭仍碧滋
蹉跎獻賦客歎息此良時
日夕雲臺下商歌空自悲

和劉明府宴縣前山亭

城隅勞心處雪後歲芳開
山映千花出泉經

萬井來翔鸞欲下舞上客且留杯

新雨喜得王卿書問

苦雨暗秋徑寒花垂紫苔愁中綠罇盡夢裏
故人來果有相思字銀鈎新月開

賦得巢燕送客

能棲杏梁際不與黃雀群夜影寄紅燭朝飛
高碧雲含情別故侶花月惜春分

白石枕并序

起與監察御史畢公耀交之厚矣頃於藍水

錢考功集卷第一
得片石皎然霜明如其德也許爲枕贈之及
琢磨將成炎暑已謝俗曰此猶班女之扇可
退也君子曰不然此真畢公之佳賞也故珍
而賦之

琢珉勝水碧所貴素且貞曾無白圭玷不作
浮磬鳴捧來太陽前一片新冰清沉沉風憲
地待爾秋已至璞堅難爲功誰怨晚成器比
德無磷緇論交亦如此

錢考功集卷第一

錢考功集卷第二

五言古詩

海畔秋思

匡濟難道合去留隨興牽偶為謝客事不顧
平子田魏闕賁翹楚此身長棄捐箕裘空在
念拙訕誰推賢無用即明代養痾仍壯年日
夕望佳期帝鄉路幾千秋風晨夜起零落愁
芳筌

太子李舍人城東別業

南山轉群木昏曉擁山翠小澤近龍居青蒼
常雨氣君家北原上千金買勝事丹闕退朝
迴白雲迎賞至新晴村落外處處煙景異片
水明新崖餘霞入古寺東臯指歸翼月盡有
餘意

谷口新居寄同省朋故

種黍傍煙溪榛荒兼沮洳亦知生計薄所貴
隱身處橡栗石上林莓苔水中路蕭然授衣
日得此還山趣汲井愛秋泉結茆因古樹閑

雲與幽鳥對我不能去寄謝鴛鴦群狎鷗拙
所慕

京兆尹廳前甘棠樹降甘露

內史用堯意理京宣惠慈氣和祥則降孰謂
天難知濟旱露為兆有如填應箎豈無天桃
樹灑此甘棠枝玉色與人淨珠光臨筆垂協
風與之俱物性皆熙熙何必鳳池上方看作
霖時

秋夜作

萬計各無成寸心日悠漫浮生竟何窮巧曆
不能筭流落四海間辛勤百年半商歌向秋
月哀韻兼浩嘆寤寐然佳期美人隔霄漢寒
雲度窮水別業遶垂幔窓中問談鷄長夜何
時旦

觀村人牧山由

六府且未盈三農爭務作貧民乏井稅瘠土
皆墾鑿禾黍入寒雲茫茫半山郭秋來積霖
雨霜降方銍獲中田聚黎甿反景空村落顧

慙不耕者微祿同衛鶴庶追周任言敢負謝
生諾

裴侍郎湘川廻以青竹筒相遺因而

贈之

楚竹青玉潤從來湘水陰緘書取直節君子
知虚心入用隨憲簡積文不受金體將丹鳳
直色映清霜深寧肯假伶倫謬為龍鳳吟唯
將翰苑客昔祕瑤華音長跪捧嘉貺歲寒慙
所欽

東城初陷與薛員外王補闕暝投南

山佛寺

日具石門裏松聲山寺寒香雲空靜影定水
無驚湍洗足解塵纓忽覺天形寬清鍾揚虛
谷微月深重巖噫我朝露世翻浮與波瀾行
運遘憂患何緣親盤桓庶將鏡中象盡作無
生觀

奉和張荊州巡農晚望

太清霽雲雷陽春陶物象明牧行春令仁風

助昇長時和俗勤業播殖農厥壤陰陰桑陌
連漠漠水田廣郡中忽無事方外還獨往日
暮駐歸軒湖山有佳賞宣城傳逸韻千載誰
此響

送包何東遊

水國嘗獨往送君還念茲湖山遠近色昏旦
煙霞時子好謝公跡常吟孤嶼詩果乘扁舟
去若與白鷗期野趣及春好客遊欣此辭入
雲投館僻采碧過帆遲江上日迴首琴中勞

別思春鴻刷歸翼一寄杜蘅枝

酬陶六辭秩歸舊居見簡

靜節昔高尚令孫嗣清徽舊廬雲峰下獻歲
車騎歸去俗因解綬憶山得采薇田疇春事
起里巷相尋稀淵明醉乘興間門祗掩扉花
禽驚曙月鄰女上鳴機畢娶願已果養恬志
寧違吾當掛朝服同爾緝荷衣

奉使採箭籐竹谷中晨興赴嶺

孤客倦夜坐聞猿乘早發背溪已斜漢登棧

尚殘月重峰轉森爽幽步更超越雲木聳鶴
巢風蘿掃虎穴人群徒自遠世役終難歇入
山非買山采竹異采蕨誰見子牟意惰勞書
魏闕

同嚴逸人東溪泛舟

子陵江海心高跡此間放漁舟在溪水曾是
敦夙尚朝霽收雲物垂綸獨清曠寒花古岸
傍唳鶴晴砂上紛吾好真逸不遠來相訪已
接方外遊仍陪郢中唱歡言盡佳酌高興延

秋望日暮浩歌還紅霞亂青嶂

過沈氏山居

雞鳴孤煙起靜者能卜築喬木出雲心閑門
掩山腹貧交喜相見把臂歡不足空宴
言未日清耳目泉聲冷樽俎荷氣香童僕往
往仙犬鳴樵人度深竹酒酣出谷口世網何
羈束始願今不從區區折腰祿

贈栢巖老人

日與麋鹿群賢哉買山叟龐眉忽相見避世

一何久林栖占崖曲舒事佳春後瓠葉覆荆
扉粟苞垂甕牖獨歌還獨酌不耕亦不耦
田隔雲溪多雨長根莠煙霞得情性身世同
芻狗寄謝營道人天真此翁有

送薛判官赴蜀

橫吹聲轉悲羽觴酣欲別舉目叩關遠離心
不可說邊陲勞帝念日下降才傑路極巴水
長天銜劔峰缺單車動夙夜越境正炎節星
橋過客稀火片蒸雲熱陰符能制勝千里在

坐决始見儒者雄長纓繫餘孽

詔許昌崔明府拜補闕

儒者久營道詔書方問賢至精一耀世高步
誰同年何樹可棲鳳高梧枝拂天脫身鳧鳥
裏載筆虎圍前日月傳軒后衣冠真列仙則
知驪龍珠不祕清泠泉才子貴難見郢歌空
復傳惜哉効頻客心想勞嬋娟

仲春晚尋覆釜山

蝴蝶弄和風飛花不知晚王孫尋芳草步步

忘路遠况我愛青山涉趣皆遊踐縈迴必中
路陰晦陽復顯古岸生新泉霞峯映雪巘交
枝花色異竒石雲根淺碧洞志忘歸紫芝行
可塞方嗤嵇叔夜林卧方沉湎

贈鄰東鄭少府

一聞白雪唱願見清陽久誰為結綬來得陪
趨府後小邑藍溪上卑棲愜所偶忘言復連
墻片月亦携手草色同春徑鶯聲共高柳美
景百花時平生一盞酒聖朝法天地以我為

金華山志卷二
七
芻狗秩滿歸白雲期君訪谷口

謝張法曹萬頃小山暇景見憶

樂道隨去處養和解朝簪茅堂近丹闕佳致
一何深退食不趨府忘機還在林清風亂流
上末日小山陰解籜雨中竹將雛花際禽物
華對幽寂絃酌兼詠吟自昔仰高步及茲勞
所欽郢歌叨繼組知己復知音

罷章陵令山居過中峰道者二首

寧辭園令秩不改淵明調解印無與言見山

始一笑幽人還絕境誰道苦奔峭隨雲刺渡
溪出門更垂釣吾廬青霞裏窓樹玄猿嘯微
月清風來方知散髮妙

丘壑趣如此暮年始棲偃賴遇無心雲不笑
歸來晚鳴鳩拂紅枝初服傍清畎昨日山僧
來猶嫌嘉遁淺託君紫陽家路滅心更遠睇
雲創其居抱犢上絕巘杏田溪一曲霞徑峰
幾轉跂石揖飛泉謝公應在眼願言携手去
採藥長不返

登覆釜山遇道人二首

晨策趣無涯，名山深轉秀。
三休變覆景，萬轉迷宇宙。
攀崖到天窓，入洞窮玉溜。
側逕蹲恠石，飛蘿擲驚狖。
花間鍊藥人，鷄犬和乳竇。
散髮便迎客，采芝仍滿袖。
郭璞賦遊仙，始願今可就。

真氣重嶂裏，知君嘉遁幽。
山階壓丹穴，藥井通湫流。
道者帶經出，洞中攜我遊。
欲驂白蜺去，且爲紫芝留。
勿憶武陵事，別家疑數秋。

尋華山雲臺觀道士

秋日西山明勝趣引孤策桃源數曲盡洞口
兩岸折還從罔象來忽得仙靈宅霓裳誰之
子霞酌能止客殘陽在翠微携手更登歷林
行拂煙雨溪望亂金碧飛鳥下天窓裏松際
雲壁稍尋玄蹤遠死入寥天寂願言葛仙翁
終年鍊玉液

海上卧疾寄王臨

離客窮海陰蕭辰歸思結一隨浮雲滯幾恁

黃鵠別妙年即沉痾生事多所闕劔中負明
義枕上惜玄髮之子良史才華簪偶時哲相
思千里道愁望飛鳥絕歲暮冰雪寒淮湖不
可越百年去心慮孤影守薄劣獨餘慕侶情
金石無休歇

登玉山諸峯偶至悟真寺

郭南雲水佳訟簡野情發紫芝每相引黃綬
不能謀稍入石門幽始知靈境絕冥搜未寸
畧仙經俄九折蟠木蓋石梁崩崖露雲穴數

峯拔崑嶠秀色與空澈玉氣交晴虹桂花留
曙月半巖採珉者一點如片雪真賞無前程
竒觀寧暫輟更聞東林磬可聽不可說興中
尋覺花寂爾諸象滅

長安客舍贈李行父明府

藏器偶時少知人自古難遂令丹穴鳳晚食
金琅玕誰謂兵戈際鳴琴方一彈理煩善用
簡濟猛能兼寬夙夜念黎庶寢興非宴安洪
波未靜壑何樹不驚鸞鳧鳥傍京輦吐心縣

灌壇高槐暗苦雨長劍生秋寒旅食還時客
飢年亦盡歡親勞攜斗水往往救泥蟠但恐
酬明義蹉跎芳歲闌

美楊侍御清文見示

伯牙道喪來絃絕無人續誰知絕唱後更有
難和曲層峰與清流逸勢競奔感清文不出
戶仿佛皆在目霧雪看滿懷蘭茝坐盈掬孤
光碧潭月一片崑崙玉初見歌陽春韶光變
枯木再見見吟白雪便覺雲肅肅則知造化源

方寸能展縮斯文不易遇清爽心豈足願言
書諸紳可以爲佩服

山居新種花藥與道士同遊賦詩

自樂魚鳥性寧求農牧資淺深受巖壑疏鑿
盡幽奇雨花相助好鶯鳴春草時種蘭入山
翠引葛上花枝風露折紅紫綠溪復映池新
泉香杜若片石隱江籬宛謂武陵洞潛應造
化移杖策攜煙客滿袖撥芳蕤蝴蝶舞留我
仙雞間傍籬但令黃精熟不慮韶光遲笑指

雲蘿徑樵人那得知

初黃綬赴藍田縣作

蟠木無匠伯終年棄山樊苦心非良知安得
入君門忽忝英達顧寧窺造化恩螢光起腐
草雲翼騰沉鯤片石世何用良工心所存一
叨尉京甸三省懃黎元賢尹止趨府僕夫儼
歸軒眼中縣胥色耳裏蒼生言居人散山水
即境真桃源鹿聚入田逕鷄鳴隔嶺村食和
俗久清到邑政空論且嘉訟庭寂前階滿芳

蓀

歸義寺題震上人壁

入谷逢雨花香綠引幽步
招提繞泉石萬轉同一趣
向背森碧峯淺深羅古樹
堯皇未登極此地曾隱霧
祕識得神謀因高思虎路
太陽忽臨照物象俄光煦
梵王宮始開長者金先布
白水入禪境礪山通覺路
徃徃無心雲猶起潛龍處
仍聞七祖後佛子繼調御
溪馬投慧燈山蟬飽甘露
不作解纓客寧知捨筏

喻身世已悟空歸途復何去

送李四擢第歸覲省

當年貴得意文事各爭名獨唱陽春曲唯君
金玉聲懸黎寶中出高價世難掩鴻羽不低
飛龍津徒自險直矜鸚鵡賦不貴芳桂枝少
俊蔡邕許長鳴唐舉知梁城下熊軾朱戟何
曄耀才子欲歸寧棠花已含笑門高知慶大
子孝覺親榮獨攬還珠美寧唯問綰情離筵
不盡醉慘袂一何早馬蹄西別輕樹色東看

好行塵忽不見惆悵青門道

卧病李員外題扉而去

僻陋病者居蒿萊行徑失誰知
簪綬貴能問幽憂疾珂聲未駐
門蘭氣先入室沉疴不冠帶
安得候蓬華清陽去莫尋離
念頃來侵崔栖高窓靜日出
脩桐陰枕上憶君子悄悄唯
苦心

送李大夫赴廣州

一賢間氣生麟趾鳳凰羽
何意人之望未為

王者輔出鎮忽推才盛哉文且武南越寄維
城雄雄擁甲兵鼓門通幕府天井入軍營厥
俗多豪侈古來難致禮唯君飲冰心可酌貪
泉水忠臣感聖君徇義不邀勲龍鏡逃山魅
霜嵐破嶂雲征途凡幾轉魏闕終在眼向郡
海潮迎指鄉關樹遠按節化甌閩下車佳政
新應令尉佗俗還作上皇人支離交俊哲弱
冠至華髮昔許霄漢期今嗟鵬鷄別圖南不
可御惆悵守薄劣

錢考功集卷第二

錢考功集卷第三

七言古詩

紫參歌并序

紫參幽芳也五葍連萼狀飛禽羽舉俗名之
五鳥花起故山道人蘭若尤豐此藥校書劉
公詠歌之俾予繼組

遠公林下滿青苔春藥偏宜間石開往往幽
人尋水見時時僊蝶隔雲來陰陽雕刻花如
鳥對鳳連雞一何小春風宛轉虎溪傍紫翼

紅翹翻霽光，貝葉經前無住色。蓮花會裏暫
留香，蓬山才子憐幽性。白雪陽春動新詠，應
知仙卉老雲霞。莫賞夭桃滿蹊徑。

瑪瑙杯歌

瑤溪碧岬生奇寶，剖質披心出文藻。良工雕
飾明且鮮，得成珍器入芳筵。含華炳麗金罇
倒翠竿，瓊觴忽無色。繁絃急管催獻酬，倏若
飛空生羽翼。堪堪蘭英照豹斑，滿堂詞客盡
朱顏。花光來去傳香袖，霞影高低傍玉山。王

孫彩筆題新詠碎錦連珠復輝映世情貴耳
不貴奇謾說海底珊瑚枝寧及琢磨當妙用
燕歌楚舞長相隨

鋤藥詠

蒔藥穿林復在巘濃香秀色深能淺雲氣垂
來裏露偏松陰古處知春晚拂曙殘鷺百轉
催縈泉帶石幾花開不隨飛鳥緣枝去如笑
幽人出谷來對之不覺忘踈懶廢卷荷鋤嫌
日短豈無萱草樹堦墀惜爾幽芳世所遺但

使芝蘭出蕭艾不辭手足皆胼胝寧學陶潛
空嗜酒頹齡捨此事東菑

病鶴篇

獨鶴聲哀羽摧折沙頭一點留殘雪三山仙
侶能遠翔五里徘徊忍爲別驚群各畏野人
機誰肯相將霞外飛不及洲見長比翼隨波
雙泛復雙歸碧海滄江深且廣日盡天倪安
得往雲山隔路不隔心宛頸和鳴長在想何
時白霧卷青天接影追飛太液前

片玉篇

至寶未為代所奇韞靈示璞荆山垂獨使虹
光天子識不將清韻世人知世人所貴惟燕
石美玉對之成瓦礫空山埋照凡幾年古色
蒼痕宛自然重溪羃羃暗雲樹一片熒熒光
石泉美人之鑒明且徹玉指提攜歎竒絕試
勞香袖拂莓苔不覺清心皎冰雪連城美價
幸逢時命代良工豈見遺試作珪璋禮天地
何如璠璪在堦墀

畫鶴篇

點素凝姿任畫工
霜毛玉羽照簾櫳
借問飛鳴華表上
何如粉績彩屏中
文昌官近芙蓉闕
蘭室氤氳香
且結鑪氣朝成緱嶺雲
銀燈夜作華亭月
日暖花明梁燕歸
應驚片雪在仙闈
主人顧盼千金重
誰肯徘徊五里飛

秋霖曲

君不見聖主旰食憂元元
秋風苦雨暗九門
鳳凰池裏沸泉騰
蒼龍闕下生雲根
陰精離

畢太淹度倦鳥將歸不知樹愁陰慘淡時殷
雷生靈墊溺若寒灰公卿紅粒爨丹桂黔首
白骨封青苔貂裘玉食張公子包灸熏天戟
門裏且如歌笑日揮金應笑禹湯能罪已鶴
鳴蛙躍正其時豹隱蘭凋亦可悲焉得太阿
決屏翳還令率土見朝曦

賦得青城山歌送楊杜二郎中赴蜀
軍

蜀山西南千萬重仙經最說青城峯青城嶽

岑倚空碧遠壓峨眉吞劔壁錦屏雲起易成
霞玉洞花明不知夕星臺二妙逐王師阮瑤
軍書王粲詩日落猿聲連玉笛晴來山翠傍
旌旗綠蘿春月營門近知君對酒遙相思

送崔校書從軍

鴈門太守能愛賢麟閣書生亦投筆寧惟玉
劔報知己更有龍韜佐師律別馬連嘶出御
溝家人幾夜望刀頭燕南春草傷心色薊北
黃雲滿眼愁聞道輕生能擊虜何嗟少壯不

封侯

送張將軍西征

長安少年唯好武
金殿承恩爭破虜
沙場烽火隔天山
鐵騎西征幾歲還
戰處黑雲霾澣海
愁中明月度陽關
玉笛聲悲離酌晚
金方路極行人遠
計日霜戈盡敵歸
迴首戎城空落暉
始笑子卿心計失
徒看海上節髦稀

送脩武元少府

寸祿牽色養
此行寧嘆息
自矜黃綬采
蘭時

不厭丹墀芳草色百戰荒城復井田幾家春
樹帶人煙黎甿久厭蓬飄苦遲爾西南惠月
傳

送崔十三東遊

千里有同心十年一會面當杯緩箏柱倏忽
催離宴丹鳳城頭噪晚鷗行人馬首夕陽斜
灞上春風留別袂關東新月宿誰家官柳依
依兩鄉色誰能此別不相憶

送鄔三落第還鄉

郢客文章絕世稀
常嗟時命與心違
十年失路誰知己
千思思親獨遠歸
雲帆春水將何適
日愛東南暮山碧
關中新月對離罇
江上殘花待歸客
名宦無媒自古遲
窮途此別不堪悲
荷衣垂釣且安命
金馬招賢會有時

送馬明府赴江陵

陶令南行心自永
江天極目澄
秋景萬室遙
方犬不鳴雙鳧下
處人皆靜
清風高興得
湖山門柳蕭條
雙翟閑
黃花滿把應相憶
落日

登樓北望還

送畢侍御謫居

崇蘭香死玉簪折志士吞聲甘徇節忠蓋不
為明主知悲來莫向時人說滄浪之水見心
清楚楚客辭天淚滿纓百鳥喧喧噪一鷲上林
高枝亦難託寧嗟人世棄虞翻且喜江山得
康樂自憐黃綬老嬰身妻子朝來勸隱淪桃
花洞裏舉家去此別相思復幾春

送褚大落第東歸

離琴彈苦調美人慘向隅頃來荷策干明主
還復扁舟歸五湖漢家側席明敷久豈意遺
賢在林藪玉堂金馬隔青雲墨客儒生皆白
首昨夢芳洲採白蘋歸期且喜故園春稚子
只思陶令至文君不飲馬鄉貧剡中風月久
相憶池上舊游應再得酒熟寧孤芳杜春詩
成不枉晴山色念此那能不羨歸上陽諫獵
事皆違他日東流一乘興知君為我掃荆扉

送傅管記赴蜀軍

終童之死誰繼出鸞頷儒生今俊逸主將早
知鸚鵡賦飛書許載蛟龍筆峨眉玉壘指霞
標鳥沒天低幕府遙巴山雨色藏征旆漢水
猿聲咽短簫賜壁腰金應可料才略縱橫年
且妙無人不重樂毅賢何敵能當魯連嘯日
暮黃雲千里昏壯心輕別不銷魂勸君用却
龍泉劍莫負平生國士恩

行路難

君不見明星映空月太陽朝昇光盡歇君不

見凋零委路蓬長風飄舉入雲中由來人事
何常定且莫驕奢笑賤窮

盧龍塞行送韋掌記

雨雪紛紛黑山外行人共指盧龍塞萬里飛
砂咽鼓鼙三軍殺氣凝旌旆陳琳書記本翩
翩料敵張兵奪酒泉聖主好文兼好武封侯
莫比漢皇年

效古秋夜長

秋漢飛玉霜北風掃荷香含情紡織孤燈盡

拭淚相思寒漏長
簷前碧雲靜如水
月弔栖烏啼鳥起
誰家少婦事鴛鴦
機錦幕雲屏深掩
扉白玉窓中聞落
葉應憐寒女獨無
衣

山中寄時校書

蓬萊紫氣溫如玉
唯予知爾陽春曲
別來幾日芳蓀綠
百花酒滿不見君
青山一望心斷續

哭曹鈞

苦節推白首
憐君負此生
忠蓋名空立
家貧

道不行朝來相憶訪蓬華只謂淵明猶卧疾
忽見江南弔鶴來始知天上文星失常恨知
音千古稀那堪夫子九泉歸一聲鄰笛殘陽
裏酌酒空堂淚滿衣

錢考功集卷第三

金華

九

開化圖書館

Kaohua library

錢考功集卷第四

五言律詩

奉和聖製登會昌山應制

睿想入希夷，真遊到具茨。
玉鑿登嶂遠，雲輅出花遲。
泉壑凝神處，陽和布澤時。
六龍多順動，四海正雍熙。

省中對雪寄元判官拾遺昆季

萬點瑤臺雪，飛來錦帳前。
瓊枝應比淨，鶴髮敢爭先。
散影成花月，流光透竹煙。
今朝謝家

興幾處郢歌傳

山齋獨坐喜玄上人夕至

舍下虎溪徑煙霞入
暝開柴門兼竹靜
山月與僧來心瑩紅蓮水
言忘綠茗杯前峯曙更
好斜漢欲西迴

秋夜寄張韋二主簿

涼夜寒簾好輕雲過月初
碧空河色淺松葉
雨聲虛道阻天難問機
忘世易踈不知雙翠
鳳棲棘復何如

歸故山路逢隣居隱者

握手雲棲路潛然恨幾重誰知綠林盜長占
綵霞峰心死池塘草聲悲石逕松無因芳杜
月琴酒更相逢

落第劉拾遺相送東歸

不醉百花酒傷心千里歸獨收和氏玉還採
舊山薇出處離心盡榮枯會面稀預愁芳草
色一徑入衡闈

和劉七讀書

夜雨深館靜苦心黃卷前雲陰留墨沼螢影
傍華編夢鳥富青藻通經仍妙年何愁丹穴
鳳不飲玉池泉

早下江寧

暮天微雨散涼吹片帆輕雲物高秋節山川
孤客情霜蘋留楚水寒燕別吳城宿浦有歸
夢愁猿莫夜鳴

登復州南樓

孤樹延春日他山卷曙霞客心湖上鴈歸思

日邊花行李迷方久歸期涉歲賒故人雲路
隔何處寄瑤華

江陵晦日陪諸官泛舟

節物堪爲樂江湖有主人舟行深更好山趣
久彌新罇酒平生意煙花異國春城南無夜
月長袖莫留賓

縣城秋夕

山城日易夕愁坐先掩扉俸薄不酤酒家貧
忘授衣露重蕙花落月冷莎鷄飛効拙慙無

補雲林歎再歸

秋夜梁七兵曹同宿二首

一笑不可得同心相見稀
摘菱頻貰酒待月未扃扉
星影低驚鵲蟲聲傍旅衣
卑棲歲已晚共羨鴈南飛

好欲棄吾道今宵又遇君
老夫相勸酒稚子待題文
月下誰家笛城頭幾片雲
如何此幽興明日重離群

和萬年成少府寓直

赤縣新秋夜文人藻思催鐘聲自仙掖月色
近霜臺一葉兼螢度孤雲帶鴈來明朝紫書
下應問長卿才

春夜過長孫繹別業

佳期難再得清夜此雲林帶竹新泉冷穿花
片月深含毫凝逸思酌水話幽心不覺星河
轉山枝驚曙禽

題溫處士山居

誰知白雲外別有綠蘿春苔遶溪邊徑花深

洞裏人逸妻看種藥稚子伴垂綸穎上逃堯
者如何此養真

題陳季壁

郢人何苦調飲水仍布衾煙火晝不起蓬蒿
春欲深前庭少喬木隣舍聞新禽雖有徵賢
詔終傷不遇心

贈鄰居齊六司倉

沉冥衆所遺咫尺絕佳期始覺衡門下儵然
太古時鷄聲共林巷燭影隔茅茨坐惜牛羊

徑芳蓀白露滋

送征鴈

秋空萬里淨嘹唳獨南征
風急翻霜冷雲開見月驚
塞長怯去翼影滅有餘聲
悵望遙天外鄉愁滿目生

宴鬱林觀張道士房

滅跡人間世忘歸象外情
竹壇秋月冷山殿夜鍾清
仙侶披雲集霞杯達曙傾
同歡不可再朝暮赤龍迎

秋夕與梁鎰文宴

客到衡門下林香蕙草時好風能自至明月
不須期秋月翻荷影晴霜脆柳枝留歡美清
夜寧覺曉鍾遲

哭空寂寺玄上人

悽然雙樹下垂淚遠公房燈續生前火爐添
沒後香陰階明片雪寒竹響空廊寂滅應爲
樂塵心徒自傷

題精舍寺

勝景不易遇
入門神頓清
房房占山色
處處分泉聲
詩思竹間得
道心松下生
何時來此地
擺落世間情

開元觀遇張侍御

碧落忘歸處
佳期不厭逢
晚涼生玉井
新暑避煙松
欲醉流霞酌
還醒度竹鍾
更憐琪樹下
歷歷見遙峰

和人秋歸終南山別業

舊居三顧後
晚節重幽尋
野徑到門盡
山窓

連竹陰昔年鶯出谷今日鳳歸林物外凌雲
操誰能繼此心

故相國苗公挽歌

霸陵誰寵葬漢主念蕭何盛業留青史浮榮
逐逝波隴雲仍作雨薤露已成歌悽愴平津
閣秋風弔客過

酬劉員外雨中見寄

苦雨滴蘭砌淒風生葛衣潢汙三逕絕砧杵
四鄰稀分與玄豹隱不為湘燕飛慙君角巾

折猶肯問衡闈

賦得歸雲送李山人歸華山

秀色橫千里歸雲積幾重
欲依毛女岫初卷少夷峯
蓋影隨征馬衣香拂卧龍
牴應函谷上真氣日溶溶

過裴長官新亭

茅屋多新意芳林昨試移
野人知石路戲鳥認花枝
慢水縈蓬戶閑雲掛竹籬
到家成一醉歸馬不能騎

寄郢州郎士元使君

龍節知無事江城不掩扉詩傳過客遠書到
故人稀坐嘯看潮起行春送鴈歸望舒三五
夜思盡謝玄暉

過長孫宅與朗上人茶會

偶與息心侶忘歸才子家玄談兼藻思綠茗
代榴花岸幘看雲卷含毫任景斜松喬若逢
此不復醉流霞

下第題長安客舍

不遂青雲望愁看黃鳥飛梨花度寒食客子
未春衣世事隨時變交情與我違空餘主人
柳相見却依依

陪考功王員外城東池亭宴

無雙錦帳即絕境有林塘鶴靜踈群羽蓮開
失衆芳晴山看不厭流水趣何長日晚催歸
騎鐘聲下夕陽

過孫員外藍田山居

不知香署客謝病翠微間去幄蘭將老辭車

金華玉集卷四
一
雉亦閑近窓雲出洞當戶竹連山對酒溪霞
晚家人採蕨還

秋園晚沐

黃卷在窮巷歸來生道心五株衰柳下三徑
小園深倒薤翻成字寒花不假林龐眉謝群
彦獨酌且閑吟

窮秋對雨

晦日連苦雨動息更遭迴生事萍無定愁心
雲不閑翟門悲暝雀墨竈上寒苔始信宣城

守乘流畏曝腮

裴迪南門秋夜對月

夜來詩酒興月滿謝公樓影閉重門靜寒生
獨樹秋鶴驚隨葉散螢遠入煙流今夕遙天
末清光幾處愁

和蜀縣段明府秋城望歸期

製錦蜀江靜飛鳧漢闕遙一茲風靡草再視
露盈條旅望多愁思秋天更沈寥河陽傳麗
藻清韻入歌謠

金考功集卷四 九
晚歸藍田酬王維給事贈別

卑棲却得性每與白雲歸
徇祿仍懷橘看山
免採薇暮禽先去馬新月待開扉
霄漢時迴首知音青鎖闈

再得畢侍御書聞巴中卧疾

芳信來相續同心遠更親
數重雲外樹不隔
眼中人夢寐花駘色相思
黃鳥春更聞公幹
病一夜二毛新

宿新里館

愁人待曉鷄
秋雨暗淒淒
度燭螢時滅
傳書鴈漸低
客來知計誤
夢裏泣津迷
無以逃悲思
寒蜚處處啼

谷口書齋寄楊補闕

泉壑帶茅茨
雲霞生薜帷
竹憐新雨後
山愛夕陽時
閒鷺棲常早
秋花落更遲
家童掃蘿徑
昨與故人期

衡門春後

不厭晴林下
微風度葛巾
寧唯北窓月
自爲

上皇人叢篠輕新暑孤花占晚春寄言莊叟
蝶與爾得天真

題吳通微主人

食貧無盡日有願幾時諧長嘯秋光晚誰知
志士懷朝煙不起竈寒葉欲連階飲水仍留
我孤燈點夜齋

晚次宿預館

鄉心不可問秋氣又相逢飄泊方千里離悲
復幾重迴雲隨去鴈寒露滴鳴蛩延頸遙天

未如聞故國鍾

藍上茆茨期王維補闕

山中人不見雲去夕陽過淺瀨寒魚少叢蘭
秋蝶多老年踈世事幽性樂天和酒熟思才
子溪頭望玉珂

春夜寓直

養性慣雲卧為郎如鳥棲不知仙閣峻惟覺
玉繩低帳喜香煙暖詩慙賜筆題未央春漏
促殘夢謝晨鷄

新昌里言懷

性拙偶從宦心閒多掩扉
雖看北堂草不忘
舊山薇花月霽來好
雲泉堪夢歸如何建章
漏催着早朝衣

秋夜寄袁中丞王負外

一夕盈千念方知別者勞
衰榮難會面魂夢
暫同袍片月臨堦早
晴河度鴈高應憐蔣生
徑秋露滿蓬蒿

九日閒居寄登高數子

初服棲窮巷重陽憶舊遊
門閒謝病日心醉
授衣秋酒盡寒花笑庭空
暝雀愁今朝落帽
客幾處管絃留

晚入宣城界

斜日片帆陰春風孤客心
山來指樵路岸去
惜花林海氣蒸雲黑潮聲隔雨深
鄉愁不可道浦宿聽猿吟

靜夜酬通上人問疾

東林生早涼高枕遠公房
大士看心後中宵

清漏長驚蟬出暗柳微月隱迴廊何事沉痾
久含毫問藥王

奉陪使君十四叔晚憇大雲門寺

野寺千家外閒行晚暫過炎氛臨水盡夕照
傍林多境對知心妄人安覺政和繩牀搖塵
尾佳趣滿滄波

省中春暮酬嵩陽焦道士見招

朝花飛暝林對酒傷春心流年催素髮不覺
映華簪垂老遇知己酬恩看寸陰如何紫芝

客相憶白雲深

酬苗發員外宿龍池寺見寄

寧知待漏客清夜此從容暫別迎車雉還隨
護法龍香煙輕上月林嶺靜聞鍾郢曲傳甘
露塵心洗幾重

貞懿皇后挽詞

淑麗詩傳美徽章禮飾哀有恩加象服無日
祀高襟曉月孤秋殿寒山出夜臺通靈深眷
想青鳥獨飛來

歲初歸舊山酬寄皇甫侍御

欲知愚谷好
久別與春還
鶯暖初歸樹
雲晴卻戀山
石田耕種少
野客性情閑
求仲應難見
殘陽且掩關

鑿駕避狄歲別韓雲卿

白髮壯心死
愁看國步移
關山慘無色
親愛忽驚離
影絕龍分劍
聲哀鳥戀枝
茫茫雲海外
相憶不相知

詠白油帽送客

薄質慙加首愁陰幸庇身卷舒無定日行止
必依人已沐脂膏惠寧辭雨露頻雖同客衣
色不染洛陽塵

藍上采石芥寄前李明府

淵明遺愛處山芥綠芳初翫此春陰色猶滋
夜雨餘隔溪煙葉小覆石雪花舒采采還相
贈瑤華信不如

送贊法師往上都

遠近化人天王城指日邊宰君迎說法童子

伴隨緣到處花爲雨行時杖出泉今宵松月下門閉想安禪

送沈少府還江寧

遠宦碧雲外此行佳興牽湖山入閭井鷗鳥傍神仙斜日背鄉樹春潮迎客船江樓新興發應與政聲傳

送虞說擢第東遊

湖山不可厭東望有餘情片玉登科後孤舟任興行月中嚴子瀨花際楚王城歲暮雲泉

鶴聞天更一鳴

送少微師西行

隨緣忽西去何日返東林
世路寧嗟別空門
久息心人煙一飯少
山雪獨行深
天外猿啼處
誰聞清梵音

送崑山孫少府

徇祿近滄海
乘流看碧霄
誰知仙吏去
宛與世塵遙
遠帆背歸鳥
孤舟低上潮
懸知訟庭靜
窓竹日蕭蕭

送屈突司馬克安西書記

制勝三軍勁澄清萬里餘星飛龐統驥箭發
魯連書海月低雲旆江霞入錦車遙知太阿
劍計日斬鯨魚

送時暹避難適荆南

三嘆把離袂七哀深我情雲天愁遠別豺虎
擁前程駐馬戀携手隔河聞哭聲相思昏若
夢淚眼幾時明

送邊補闕省覲

東去有餘意春風生賜衣鳳凰銜詔下才子
采蘭歸斟酒百花裏情人一笑稀別離須計
日相望在彤闈

錢考功集卷第四

欽定四庫全書

十六

開化圖書館

Kaohua library

錢考功集卷第五

五言律詩

送彈琴李長史往洪州

抱琴爲徹吏孤棹復南行
幾渡秋水皆添白雪聲
佳期來客夢幽興緩王程
佐牧無勞問心和政自平

送宋徵君讓官還山

至人無滯跡謁帝復思玄
魏闕辭花綬春山有杏田
紫霞開別酌黃鶴舞離絃
今夜思君

夢遙遙入洞天

送陳供奉恩勅放歸覲省

得意今如此清光不可攀
臣心堯日下鄉思楚雲間
楊柳深歸棹芙蓉棲舊山
采蘭兼衣錦何似買臣還

送外甥范勉赴任常州長史兼覲省

憐君展驥去能解倚門愁
就養仍榮祿還鄉即畫遊
橘花低客舍葦菜繞歸舟
與報垂綸叟知吾世網留

隴右送章三還京

春風起東道握手望京關
柳色從鄉至鶯聲送客還
嘶驂顧近驛歸路出他山
舉目情難盡羈離失志間

送元評事歸山居

憶家望雲路東去獨依依
水宿隨漁火山行到竹扉
寒花催酒熟山犬喜人歸
遙羨書窓下千峰出翠微

送武進韋明府

理邑想無事鳴琴不下堂
井田通楚越津市半漁商
盧橘垂殘雨紅蓮折早霜
送君催白首臨水獨思鄉

送上官侍御

執簡朝方下乘輅去不賒
感恩輕遠道入幕比還家
碣石春雲色邯鄲古樹花
飛書報明主烽戍靜天涯

送郭秀才制舉下第南遊

失志思浪跡知君晦近名
出關塵稍遠過郢

興彌濃山盡溪初廣
人閒舟自行探幽無旅
思莫畏楚猿鳴

送夏侯審校書東歸

楚鄉飛鳥沒獨與碧雲還
破鏡催歸客殘陽見舊山
詩成流水上夢盡落花間
儻寄相思字愁人定解顏

送衛功曹赴荆南

漢家仍用武才子晚成名
惆悵江陵去誰知魏闕情
碧雲愁楚水春酒醉宣城
定想褰帷

政還聞坐嘯聲

送馬使君赴鄭州

東土忽無事專城復任賢
喜觀班瑞禮還在
偃兵年膏雨帶滎水
歸人耕圃田遙知下車
日萬井起新煙

送郎四補闕東歸

無事共干世多時
廢隱淪相看戀簪組
不覺老風塵
勸酒憐今別
傷心倍去春
徒言樹萱
草何處慰離人

送陸三出尉

春草晚來色東門愁送君
盛才仍下位明代
負奇文且樂神仙道
終隨鴛鴦群梅生寄黃
綬不日在青雲

送安都秀才北還

年少工文客言離卻解顏
不嗟荆寶退能喜
絲衣還新月來前館
高陽出故關相思東北
望燕趙隔青山

送褚十二澡擢第歸吳覲省

金水
四
林表吳山色詩人思不忘向家流水便懷橘
綵衣香滿酌留歸騎前程未夕陽愴茲江海
去誰惜杜蘅芳

送費秀才歸衡州

南望瀟湘渚詞人遠憶家客心隨楚水歸棹
宿江花不畏心期阻惟愁面會賒雲天有飛
翼方寸佇瑤華

送陸郎中

事邊仍戀主舉酒復悲歌粉署含香別轅門

載筆過鶯聲出漢苑柳色過漳河相憶情難
盡離居春草多

送僧歸日本

上國隨緣至來途若夢行浮天滄海遠去世
法船輕水月通禪觀魚龍聽梵聲惟憐一燈
影萬里眼中明

送楊暉擢第遊江南

行人臨去水新詠復新悲萬里高秋月孤山
遠別時掛帆嚴子賴酌酒敬亭祠歲宴無芳

杜如何寄所思

送田倉曹歸覲

竒絲絡驄馬去府望梁城節下趨庭出秋來
懷橘情別筵寒日晚歸路碧雲生千里相思
夜愁看新月明

送張管書記

邊事多勞役儒衣逐鼓鞶日寒關樹外峰盡
塞雲西河廣蓬難渡天遙鴈漸低班超封定
遠之子去思齊

送蕭常侍北使

絳節引雕戈，鳴騶動玉珂。
戎城去日遠，漢使隔年多。
鴈宿常連雪，沙飛半度河。
明光朝即迺，秋社早成歌。

送李棲桐道舉擢第還鄉省侍

幾年深道要，一舉過賢關。
名與玄珠出，鄉宜畫錦還。
蓮舟同宿浦，柳岸向家山。
欲見寧親孝，儒衣稚子斑。

送柳道士

金華集卷五
去世能成道遊仙不定家歸期千歲鶴行邁
五雲車海上春應盡壺中日未斜不知相憶
處琪樹幾枝花

送陸侍御使新羅二首

衣冠周柱史才學我鄉人受命辭雲陛傾城
送使臣去程滄海月歸思上林春始覺儒風
遠殊方禮樂新

萬里三韓國行人滿目愁辭天使星遠臨水
澗霜秋雲佩迎仙島虹旌過蜃樓定知懷魏

闕迴首海西頭

送虞說擢第南歸覲省

南風起別袂
心到衡湘間
歸客楚天遠
孤舟雲水閒
愛君采蘭處
花鳥連家山
得意且寧省
人生能幾還

送陸贄擢第還蘇州

鄉路歸何早
雲間喜擅名
思親盧橘熟
帶雨客帆輕
夜火臨津驛
晨鐘隔浦城
華亭養仙羽
計日再飛鳴

送原公南遊

有意無程去飄然二翼輕故鄉多久別春草
不傷情洗鉢泉初暖焚香曉更清自言難解
縛何日伴師行

送萬兵曹赴廣陵

秋日思遠客臨流語別離楚城將坐嘯郢曲
有餘悲山晚桂花老江寒蘋葉衰應須揚得
意更誦長卿詞

送李判官赴桂州幕

欲知儒道貴縫掖見諸侯且感千金諾寧辭
萬里遊鴈峰侵瘴遠桂水出雲流坐惜離居
晚相思綠蕙秋

賦得寒雲輕重色送子恂入京

無限寒雲色蒼茫淺更深從龍如有瑞捧日
不成陰積翠全低嶺虛明半出林帝鄉遙在
目鐵馬又駸駸

賦得叢蘭曙後色送梁侍御入京

曙色傳芳意分明錦繡叢蘭生露後日花發

金夫身卷五
夜來風不向三峰裏全勝一縣中遙知大苑
內應待五花駘

賦得餘冰送李中丞之浙西

曉日餘冰上春池一鏡明多從履處薄偏向
飲時清比雪光仍在因風片不成更隨舟楫
去猶可助堅貞

賦得浦口望斜月送皇甫判官

起見西樓月依依向浦斜動搖生淺浪明滅
照寒沙水渚猶疑雪梅林不辨花送君無可

贈侍此代瑤華

賦得綿絲思遠道送岑判官入嶺

極目煙霞外孤舟一使星興中尋白雪夢裏
過滄溟夜月松江戍秋風竹塢亭不知行遠
近芳草日青青

江寧春夜裴使君送蕭員外

花院日扶踈江雲自卷舒主人熊軾任歸客
雉門車曙月稀星裏春煙紫禁餘行看石頭
戍記得是南徐

送薛八謫居

東水將孤客南行路幾千虹翻潮上雨鳥落
瘴中天謫去寧留恨思歸豈待年銜杯且一
醉別淚莫潛然

送衡陽歸客

歸客愛鳴榔南征憶舊鄉江山追宋玉雲雨
憶荆王醉裏宜城近歌中郢路長憐君從此
去日夕望三湘

送員外侍御入朝

別思亂無緒妖氛猶未清
含香五夜客持賦
十年兄霜拂金波
樹星迴玉斗城
自憐江上鶴垂翅
羨飛鳴

送李諫議歸荊州

歸舟同不繫
織草剩忘憂
禁掖曾通籍
江城舊列侯
暮帆依夏口
春雨夢荊州
何日朝雲
陛隨君拜冕旒

送元中丞江淮轉運

薄稅歸天府
輕徭賴使臣
歡沽賜帛老恩及

卷綃人去問殊官俗來經幾劫春東南卸亭
上莫問有風塵

送唐別駕赴郢州

少年從事好此去別愁輕滿坐詩人興隨君
郢路行蒹葭侵驛樹雲水抱山城遙愛下車
日江皋春草生

送鄭巨及第後歸覲

多才白華子初擅桂枝名嘉慶送歸客新秋
帶雨行離人背水去喜雀近家寧別贈難爲

此衰年畏後生

宿遠上人蘭若

香花閉一林真士此看心行道白雲近燃燈
翠壁深梵筵清水月禪坐冷山陰更說東溪
好明朝乘興尋

酬元祕書晚出藍溪見寄

野興引才子獨行幽徑遲雲留下山處鳥靜
出溪時拙宦不忘隱歸休常在茲知音儻相
訪炊黍掃茆茨

別張起居

有別時留恨銷魂況在今風濤初振海鷁鷺
各辭林舊國關河絕新秋草露深陸機嬰世
網應負故山心

郭司徒廳夜宴

秋堂復夜闌舉目盡悲端霜堞烏聲苦更樓
月色寒美人深別意斗酒少留歡明發將何
贈平生雙玉盤

初至京口示諸弟

還家百戰後訪故幾人存兄弟得相見榮枯
何處論新詩添卷軸舊業見兒孫 平生
事焉能 門

月下洗藥

汲井向新月分流入泉芳濕花低桂影翻葉
醉泉光露下添餘潤蜂驚引暗香寄言養生
客采采共提筐

晚春未寧野小園獨坐寄上王相公
東閣一何靜鶯聲落日愁夔龍暫為別昏旦

思兼秋蕙草出籬外花枝寄竹幽上方傳雅
頌七夕讓風流

歲暇題茅茨

谷口逃名處歸來遂野心薄田供歲酒喬木
待新禽溪路春雲重山厨夜火深桃源應漸
好仙客許相尋

九日登玉山

霞景青山上誰知此勝遊龍沙傳往事菊酒
對今秋步石隨雲起題詩向水流忘歸更有

處松下片雲幽

宴崔駙馬玉山別業

金榜開青鎖，驕奢半隱淪。
玉蕭惟送酒，羅袖愛留賓。
竹館煙催暝，梅園雪悞春。
滿朝詞賦客，盡是入林人。

春谷幽居

黃鳥鳴園柳，新陽改舊陰。
春來此幽興，宛是謝公心。
掃逕蘭芽出，添池山影深。
虛名隨振鷺，安得夕棲林。

賦得池上霞丁香樹

得地移根遠交柯遶指柔露香濃結桂池影
闕蟠虬黛葉輕筠綠金花笑菊秋何如南海
外雨露隔炎洲

題樊川杜相公別業

數畝園林好人知賢相家結茅書閣儉帶水
槿籬斜古樹生春鮮新荷卷落花聖恩加王
鉉安得卧青霞

酬盧十一過宿

乞還方未遂日夕望雲林况復逢青草何勞
問此心閉門公務散枉策故情深遙夜他鄉
宿同君梁甫吟

崔十四宅問候

曉日早鶯啼江城旅思迷微官同寄傲移疾
阻招攜遠水間閭內青山雉堞西王孫莫久
卧春草欲萋萋

山路見梅感而有作

莫言山路僻還被好風催行客淒涼過村籬

冷落開晚溪寒水照晴日數蜂來重憶江南
酒何因把一杯

詠門上畫松上元王杜三相公

昔聞生澗底今見起毫端衆草此時沒何人
知歲寒豈能裨棟宇且欲出門闌只在丹青
筆凌雲也不難

早發東陽

信風催過客早發梅花橋數鴈起前渚千艘
爭便潮將隨浮雲去日惜故山遙惆悵煙波

末佳期在碧霄

舟中寄李起居

南行風景好
昏旦水皋閑
春色郢中樹
晴霞湖上山
去家旅帆遠
迴首暮潮還
蕙草知何贈
故人雲漢間

夜雨寄寇校書

秋館煙雨合
重城鍾漏深
佳期阻清夜
孤興發離心
燭影出綃幕
蟲聲連素琴
此時蓬閣友
應念昔同衾

喜李侍御拜郎官入省

粉署花駘入丹霄紫誥垂直廬驚漏近賜被
覺霜移漢主前瑤席穰侯許鳳池應憐後行
鴈空羨上林枝

蘇端林亭對酒喜雨

小雨飛林頂浮涼入晚多能知留客處偏與
好風過濯錦翻紅蘂跳珠亂碧荷芳罇深幾
許此興可酣歌

見上林春鴈翔青雲因寄楊起居李

員外

上林春更好賓鴈不知歸顧影憐青籞傳聲
入紫微夜陪池露宿朝出苑花飛寧憶寒鄉
侶鸞凰一見稀

偶成

含毫意不淺微月上簾櫳門靜吏人息心閑
囹圄空繁星入踈樹驚鵲倦秋風始覺牽卑
劇宵眠亦在公

漁潭值雨

日入林島異鶴鳴風草間孤帆泊枉渚飛雨
來前山客意念留滯川途忽阻艱赤亭仍數
里夜待安流還

題蕭丞小池

鸞鳴蕙草綠朝與情人期林沼忘言處鴛鴻
養翮時春泉滋藥暖晴日度花遲此會無辭
酒良晨難再追

錢考功集卷第五

開化圖書館

Kaishua library

開化圖書館

Kaichua library

開化圖書館

Kaichua library

開化圖書館

kaikwa library

Blue Cyan Green Yellow Red Magenta White 3/Color

© The Tiffen Company, 2007

TIFFEN Color Control Patches

Centimetres

1 2 3 4 5 6 7 8 9 10 11 12 13 14 15 16 17
1 2 3 4 5 6 7 8 9 10 11 12 13 14 15 16 17
Inches



錢
考
功
集


開元圖書館

Kaohua library

一

開化圖書

Kaishua Library



TIFFEN Color Control Patches

© The Tiffen Company, 2007

Blue

Cyan

Green

Yellow

Red

Magenta

White

3/Color